

中國方志叢書·華中地方·第七六號


據

清·鄧鍾玉等纂修  
清·光緒二十年鉛字重印本

影印

浙江省

# 金華縣志



成文出版社有限公司印行

80180175



\*10097813\*

中國方志叢書·華中地方·第七六號


據

清·鄧鍾玉等纂修  
清·光緒二十年鉛字重印本

影印

浙江省

# 金華縣志



成文出版社有限公司印行



\*10097814\*

中華民國五十九年七月壹一版

# 金華縣志

全四冊

發行人：黃 成 助

出版者：成文出版社有限公司

台北郵政信箱二二六〇五號  
台北市羅斯福路三段279之二號  
電話：三七〇一三二號

印刷者：東南印製廠有限公司  
和平西路二段70巷83弄29號

內政部登記證內版台業字第一一四七號

光緒金華縣志卷九

志人物第三四

忠烈

殺身成仁舍生取義是曰忠烈自古重之國史載天下事祇能及將相羣臣而於卑官下吏士卒婦女固賴於志乘是在秉筆者之悉心采訪力爲表揚惜張樞有宋季遺事之作而皆末由見其前則更無望焉此於戚趙諸志爲忠義道光志不立名目

吳留贊留略

梁李瞻

宋王宰王積中

陳德固

元劉良

明朱真

曹鳴鶴

俞宗道

鄭國祥

邵起邵希袞邵希襄

葉春苞

黃文玉

朱大典朱萬化朱萬仍朱萬仔朱萬侍朱鉦朱錫

倪泰亨倪士伯倪士佩

倪士儼倪懋參

陳自修

朱邦祿朱鈐

葉向榮

嚴萬齡嚴思周嚴思相

傅元功傅本洪

傅元鈞

馮宏德

葉得機

索大機及子

何應嚮

國朝  
傅本有

傅宏基傅爲斗傅爲宿

曹永閭曹世勳

王玉文

吳雙遜

吳留贊字正明少爲郡吏與黃巾賊帥吳桓戰手斬之贊一足被創遂屈不申然性烈好讀兵書及三史每覽古良將戰攻之勢輒對書獨歎因呼諸近親謂曰今天下擾亂英豪並起歷觀前世富貴非有常人而我屈臂在閭巷之間存亡無以異今欲割引吾足幸不死而足申幾復見用死則已矣親戚皆難之有閒贊乃以刀自割其筋血流滂沱氣絕良久家人驚怖亦以旣爾遂引申其足足申創愈以得

蹉步凌統聞之請與相見甚奇之乃表薦於吳主權遂被試用有戰功稍遷屯騎校尉時事得失每常規諫好直言不阿旨權以此憚之後除將軍嗣主亮建興元年十月太傅諸葛恪於東興作大堤東西踞山築城列戍以遏巢湖魏遣大將胡遵諸葛誕率衆七萬來攻恪興軍四萬馳救使贊與呂據唐咨丁奉爲前部至則魏已用浮橋渡軍薄城因天寒雪且緩攻會飲見贊等兵少又但持刀楯裸身緣過大笑之不卽嚴兵贊等突前鼓譟亂斫魏軍驚擾散步爭渡浮橋橋壞落水死者無算盡獲其輜重以歸遷左將軍五鳳二年閏正月丞相孫峻聞魏將毋丘儉文欽以淮南之衆西入乃授贊節拜左護軍令與呂據率兵襲壽春以救之至蘄皋會儉等已敗欽詣降淮南餘衆數萬口來奔而魏諸葛誕亦已入壽春贊又道病峻乃班師令贊將車重先還魏遣別將蔣班以步騎四千追之及於菰陂贊病困不能整陣而大軍適遇魏將軍曹珍于高亭交戰不及救贊遂敗及將軍孫楞蔣修等皆遇害而峻則卒敗曹珍而還贊之方被追及也知必敗卽解曲蓋印綬付弟子曰吾爲將未嘗負敗今病困兵羸汝速去矣俱死無益弟子不肯受拔刀欲斫之乃去贊每臨敵必先被髮叫天抗音而歌畢乃進戰戰無不克及是敗

歎曰吾戰有常術今不能用命也時年七十三衆庶痛惜焉長子略東興之役以都尉從城既成使與將軍全端分守之各以千人佈置甫定魏軍驟至竭力捍禦亦會救至魏軍敗歸兩城屹全五鳳七年拜東海太守後調南海天紀三年夏郭馬反被殺次子平自有傳

舊志參三國志孫亮孫皓諸葛恪傳孫峻傳注兩浙名賢錄武功

梁李瞻候景陷臺城時瞻起兵爲賊所執送詣建康景先出之市斷其手剝剔折心腹破出肝腸正色整容言笑自若見其膽者乃如升焉

舊志兵變

宋王宰王積中宋宣和三年正月建德軍清溪妖賊方臘邀敗官兵於黃姑嶺陷婺州先是宰積中與戰有功特補宣義承事等郎後復戰俱死之

同上

陳德固靖康初爲京城守禦所屬官獻守禦策朝議沮之及京城失守力戰而死潘良貴哭以詩云黠虜登城日中華將士奔人皆趨北闕君獨死南門祕計無人用英聲有史存秋原悲淚落桂酒與招魂蓋紀實也

舊志參名賢錄忠烈

元劉良仕元爲常州萬戶府知事張士誠陷城闔室死之

舊志劉辰傳首

明朱真官百戶正德八年春調帶本所軍禦賊於開化死之軍兵被殺擄甚衆

舊志兵變

曹鳴鶴嘉靖時剿閩寇陣亡

舊志武彙

俞宗道主簿改武途崇禎間擢守備從金日觀征皮島陣亡

同上

鄭國祥官守備崇禎間禦許都於孝順街力戰而死

同上

邵起河南僉事調襄陽監軍崇禎十四年七月張獻忠破襄陽偕二子希哀希襄自

焚死

舊志例貢以爲襄陽陷在二月史無起死難事然月或傳寫誤死事史豈能盡載

葉春苞字培元天啓七年武舉人山東守備登萊叛將李九成犯萊誘縛巡撫孫元化春苞數進剿有功擢驃騎將軍賊鼓行前春苞力戰手殲其渠力竭死之東撫

朱大典爲題請卹

舊志

黃文玉號崑源和義里塘下人崇禎間官宣鎮懷來三營副總兵以軍功當擢總兵或諷納千金可立得否則當更立一功文玉曰千金予豈惜哉但以功遷職詎云以賄得官馬革裹尸且不畏況加功遂不果擢十四年

大清兵攻錦州祖大壽被圍洪承疇率師往救文玉與宣府總兵楊國柱至松山擣乳峯陷伏力戰死覓尸不得有知者曰將軍甲內衣皆書黃文玉三字尋之當得既而果然事聞賜祭葬贈榮祿大夫廕一子先是保安被兵文玉獲歸難民萬餘計歿後建祠祀焉

舊志

事中中官王體乾魏忠賢等十二人及乳嫗客氏假保護功廕錦衣世襲大典抗疏力諫五年紅夷亂吏部希璫旨出大典爲福建副使與撫臣南居益誘入內洋殲之進右參政以憂歸服除讀書金華山中不譚朝政避璫禍也崇禎三年起故官蒞山東旨有鼎鑊在側金石不移語尋備兵天津四年閏月登萊巡撫孫元化遣裨將李九成孔有德陳有時耿仲明毛承祿援大凌抵吳橋而反五年春陷登州執元化以邀撫朝命徐從治代駐萊州賊旋圍萊州從治中礮死更以謝璉代七月賊復以受撫詐璉陷之乃擢大典右僉都御史駐青州調度兵食而命兵部侍郎劉宇烈總督軍務宇烈日遣使往撫而賊愈熾大典疏謂受撫當投戈束矢自縛歸命以聽肆赦今乃據防以求挾撫爲質則城下盟耳於是罷總督逮宇烈專任大典爲山東巡撫督主客兵數萬及關外勁旅四千八百餘人合剿之以總兵金國奇將中官高起潛監護軍餉抵德州賊犯平度使副將牟文綬何維忠等

救之殺陳有時維忠亦被殺八月朝遣巡按御史謝三賓來監軍至昌邑請斬王洪劉國柱詔逮治之三賓復抗疏請絕口勿言撫事於是軍已齊集乃分三路國奇等關外兵爲前鋒鄧玘步兵繼之從中路灰埠進昌平總兵陳洪範副將劉澤清方登化從南路平度進參將王之富王文緯等從北路海廟進檄遊擊徐元亨等率萊陽師來會以牟文綬守新河諸軍皆攜三日糧盡抵新河東岸亂流以濟前鋒至沙河有德迎戰參將祖寬先進副將靳國臣繼之賊大敗諸軍乘勝追至城下賊夜半東遁圍解守者疑賊誘礮拒之起潛遣中使入諭闔城相慶明日南路兵始至國奇等遂擊賊黃縣斬首萬三千俘八百逃散及墜海死者數萬餘賊竄歸登州國臣等築長圍守之城三面距山一面距海牆三十里而遙東西俱抵海分番戍賊不能出發大礮官軍多死傷李九成出戰相當十一月九成搏戰降者洩其謀官軍合擊之馘於陣帝嘉解圍功進大典右副都御史將吏陞賞有差是月國奇卒以前總兵吳襄代攻圍既久賊糧絕恃水城可走不降王之富祖寬奪其水門外護牆賊大懼六年大典請伏兵海道邀其歸朝議未許二月中旬有德先載子女財帛由海遁仲明委水城於其黨王秉忠以單舸從之官軍遂入大

城攻永城未下遊擊劉良佐獻轟城策匿人永福寺中穴城置火藥發之城崩官軍入賊退保蓬萊閣大典招降始釋甲俘千餘人獲秉忠及僞將七十五人自縊及投海死者不可勝計賊盡平有德等走旅順島帥黃龍邀擊生禽毛承祿及其黨陳光福蘇有功斬李應元惟有德仲明逸去乃獻承祿等於朝磔之先一日有功脫械走帝震怒斬監守官刑部郎多獲罪未幾被執伏誅敍功進大典兵部右侍郎世廕錦衣百戶巡撫如故八年二月流賊陷鳳陽毀皇陵總督楊一鵬被逮詔大典總督漕運兼巡撫廬鳳淮揚四郡移鎮鳳陽許以撫東時所募健卒千馬千五百爲親軍自隨十一月破賊壽州尋會盧象昇追破之滁州九年聞賊侵鳳陽急還兵命總兵楊御蕃擊之宵遁十年所遣劉良佐等屢破賊而桐城告警桐城非大典分地以事急遣總兵牟文綬等往援之十一年老猗猗等掠江北會諸路逼之賊謀竄茶山與安慶巡撫史可法交遏之乃西遁先是坐失州縣及平賊逾期貶秩至是以援勦及轉漕功盡復之十三年河南賊大入湖廣遣將救援屢有功進左侍郎明年六月命總督江北及河南湖廣軍務仍鎮鳳陽專辦流賊而以可法代督漕運賊帥袁時中衆數萬橫穎毫間大典率總兵劉良佐等擊破之

敘賚有差大典以督標無兵請益主客兵三萬又密陳聯絡山寨之策當是時制撫殺賊者分三道盧象昇爲總理當一面洪承疇爲秦督當一面總漕兼淮撫以護陵當一面然二家多猛將健鬥大典獨身枝梧指示方略終其任賊不再入中都大典力也楊嗣昌之筭樞府也盧象昇洪承疇孫傳庭輩皆忤受排拏而於大典獨否大典不甚持小節通饋遺餉不時至亦恃以給其軍又督修鳳陽城工頗嚴促紳士怨之爲給事中方士亮御史鄭崐貞姜埰等所劾詔削籍候勘大典自以功過不相掩請以家財募兵自効許之遂以麾下軍居京口大集奇材劍客軍器一切自具西洋火藥至三百餘笛會東陽諸生許都憤縣令苛斂作亂圍金華大典子萬化募健兒禦之賊平而所募者不散大典聞急馳歸知縣徐調元閱都兵籍有萬化名遂言大典縱子交賊巡按御史左光先聞於朝得旨逮治籍其家充餉且令督賦給事中韓如愈趣之已而京師陷福王立吏部尙書徐石麒言大典雖貪其人材足倚今湖南殘破可令爲巡撫練士卒具糗糧自効馬士英覲其賄擬旨切責不得已結之并結阮大鍼乃召爲兵部左侍郎踰月進尙書總督上江軍務左良玉興兵命監黃得功軍禦之

大兵破南京福王奔太平大典與大鉞入見舟中誓力戰得功死王被禽兩人遂走杭州會潞王亦降大典乃還鄉郡圖據城守魯王監國以元官晉文華殿大學士建行臺督師時張國維轄東陽義烏武義永康大典轄金華蘭谿湯溪浦江各爲分地方國安率衆南奔馬阮皆託於其軍國安本與大典有隙大鉞又構使索餉四萬不與則往襲之由是圍攻金華市月監國傳旨至再始解唐王立於閩就加大典東閣大學士督師如故并授其子萬化都督同知孫鉦錦衣衛指揮旣而魯王敗入海順治三年六月

大兵下浙東國安大鉞降請破金華以自効先遣招撫使明工部員外郎徐準來招安大鉞亦馳書勸降大典裂而投之罵曰逆賊此我睢陽城也謂予亦爾乎殺招撫使而與部將吳邦璿何武固守遣鉦奉表詣唐王道出浦城被戕不達

大兵圍二旬以礮轟城城中亦以火藥禦之煙障天聲如雷城西門有新築土未堅阮大鉞識其處礮專攻之城崩大典驅婦女入井袖火繩與吳邦璿何武至火藥庫中環坐子萬仍萬仔萬侍孫鐸館師鄭邠及其他賓客僮僕願從者咸在時萬化尙巷戰旣而被執不屈死或奔告遂命舉火卽如發地震

王師反走辟易多蹂躪死索大典不得乃知在灰燼中康熙中學政王揆請祀鄉賢及忠烈祠乾隆四十二年

賜諡烈愍

舊志參明史本傳  
小興紀年附攷

倪泰亨夢申子以諸生薦授兵部主事順治三年

大兵臨郡遊騎四出被執死之子士伯士佩奔救不及抱尸慟哭死

舊志  
獨行

倪士儼亦諸生與泰亨同日死其子懋參聞難赴營求贖已遇害繞營慟哭觸石死

同上

陳自修母病危刲股療之痊後母歿刻木爲像朝夕拜至老不變丙戌佐朱大典城

守城破被執死之

同上

朱邦祿朱鈐下溪灘人並殉難

同上

葉向榮字鍾日萬歷四十六年舉人父患奇疾向榮委曲治療獲痊教弟成名聲稱藉甚崇禎十三年授甯都知縣政事具舉流賊至練兵禦之誓死守殲其黨邱旭東饒聚吾等總督袁繼咸薦之以忤馬士英量移吉安同知被劾歸順治三年大兵至投項村崖死祠甯都名宦乾隆四十三年

賜諡節愍

舊志參小腆紀年趙志

嚴萬齡字耿元文星鄉人祖必勝嘉靖中由百粵偏將擢游擊將軍平山寇及惠廣閒倭寇萬齡其四世孫也性骨鯁不習經生家言年二十餘出門投石於河曰生無所樹立者有如此值朱大典巡撫山東萬齡入其幕畫策剿賊遂平登州擢裨將崇禎八年賊陷陵寢大典鎮鳳陽十一月從破賊壽州十二月又破賊滁州九年賊再窺鳳陽陵偕總兵楊御蕃迎擊賊宵遁十一年又從破老猗猗於江北功在諸將上既而大典被劾萬齡亦解職歸丙戌大典據郡命都督諸軍時方國安兵敗江上率殘卒抄食入境萬齡出七戰破走之

大兵臨城竭力協守及陷偕杜學伸戰於東市街死之子思周思相並死康熙中學

政王機請與大典並祀忠烈祠

舊志

傅元功字仲懋東山人崇禎間選山陽主簿改武階授金華所鎮撫以從登萊撫督造海船勞擢陝西金鎖關守備改漳州六鼉營累功擢遊擊六鼉孤城瀕海多寇紅毛夷屢犯屢却之李芝奇叛斬獲三十餘級寇啣之夜誘元功入險地被害年四十有七贈定國將軍漳民塈元功像於古來塹春秋祀之朱大典爲之傳子本

洪邑庠生以蔭襲百戶

舊志

傅元鈺元功從弟年二十七爲參將福王時誠意伯劉孔昭命集鄉兵禦江未行率

五百人佐朱大典固守城破皆死之

舊志

馮宏德崇禎時選貢殉難

舊志  
選貢

葉得機二十三都三圖人字仲舒崇禎十五年以鄉兵授哨官及

大兵破城死難家人覓尸不可辨惟一金戒子識爲機物其妻徐氏曰尸真僞不可

知予不敢與同穴暨卒遂別窆焉

舊志  
遺事

索大機順治三年

大兵破城與其子某均遇害妻章氏被執至金錢寺投塘死

舊志  
烈婦

何應嚮妻盧氏爲亂兵所執不辱死應嚮曰妻能爲節婦夫敢不爲義士亦死之

同上

國朝傅本有職方司主事順治間署福州同知殉寇難

舊志  
選貢

傅宏基字有三亦東山人六歲喪父稍長喜談兵結客任俠母葉氏戒之年十七浙

撫命爲兵官防諸暨母以年稚辭康熙十三年閩亂浙東騷動耿精忠僞總兵徐

尙朝據積道山康親王臨郡知縣李錦薦其才俾團鄉兵護閭里宏基曰官軍第

專事南山其北山賊請身任之而招其歸化者事平給參將筭隨總兵援剿十四年正月尙朝退守桃花嶺險不可登宏基舍騎先士卒攀崖上奮斫奪其纛官軍繼之賊不支遁遂復處州十五年秋乘夜取江山襲仙霞關守之十六年福建平擢漳州鎮中營遊擊防龍江砦砦漳泉要道與廈門對峙而鄭錦尙據臺灣土賊四起朝夕警不解甲十七年二月賊毀江東橋總督急檄宏基移守長泰長泰東南通海潮西北並山險寇出沒無時大小百餘戰六月海澄同安相繼陷賊覬漳州冀絕我餉道先以萬餘人圍長泰宏基背城戰殲賊甚衆會淫雨泉漳援不至而奸民有通賊者應之夜半城陷被執至廈門鄭逆欲降之怒詈曰殺我毋多言賊怒剝鼻刖足置海濱無何死事

聞贈總兵蔭一子雍正五年祀忠烈祠

賜祭長子爲斗以蔭官廣東三水守備歷河北鎮總兵次子爲宿官至馬蘭鎮總兵先是宏基母葉氏夫亡撫宏基三十年備艱苦嘗病劇宏基籲諸神願減己年延母算齧股肉和藥以進果愈及宏基被戕葉曰忠孝事兒已全吾何恨焉

舊志

曹永閭字文甫拱坦鄉人雍正七年武舉人補江南大河衛千總歷四川疊溪營遊